

## ॥ कूष्माण्ड-होम-मन्त्राः ॥

यद्दे॒वा दे॒वहे॒ळनं॑ दे॒वांस॑श्च॒कृमा व॒यम्। आदि॑त्या॒स्तस्मा॑न्मा  
मु॒ञ्चत॑र्त॒स्यर्ते॑न॒ मामि॑त॒ स्वाहा॑॥१॥

(देवेभ्य आदित्येभ्य इदं न मम)

दे॒वा जी॒वनका॑म्या॒ यद्वा॒चाऽनृ॑तमूदि॒मा। तस्मा॑न्न इ॒ह मु॑ञ्चत॒ विश्वे॑  
दे॒वाः स॒जोष॑सः॒ स्वाहा॑॥२॥

(विश्वेभ्यो देवेभ्य इदं न मम)

ऋ॒तेन॑ द्या॒वापृ॑थि॒वी ऋ॒तेन॑ त्व॒ संर॑स्वति। कृ॒तान्नः॑ पा॒ह्येन॑सो  
यत्किं॑ चानृ॑तमूदि॒म स्वाहा॑॥३॥

(द्यावापृथिवीभ्यां सरस्वत्या इदं न मम)

इ॒न्द्राग्नी॑ मि॒त्रावरु॑णौ सोमो॑ धा॒ता बृ॒हस्प॑तिः। ते नो॑ मु॒ञ्चन्त्वे॑न॒सो  
यदन्य॑कृ॒तमा॑रि॒म स्वाहा॑॥४॥

(इन्द्राग्निभ्यां मित्रावरुणाभ्यां सोमाय धात्रे बृहस्पतय इदं न मम)

स॒जा॒त॒श॒सा॒दुत॑ जा॒मिश॒सा॒ज्याय॑सः॒ श॒सा॒दुत॑ वा॒ कनी॑यसः।  
अना॑धृष्टं दे॒वकृ॑तं॒ यदे॑न॒स्तस्मा॑त् त्वम॒स्माञ्जा॑तवेदो॒ मुमु॑ग्धि॒  
स्वाहा॑॥५॥

(अग्नये जातवेदस इदं न मम)

यद्वा॒चा यन्मन॑सा बा॒हुभ्या॑मू॒रुभ्या॑म॒ष्टीव॑द्वा॒ शि॒त्रैर्य॑दनृ॒तं च॑कृ॒मा

व॒यम्। अ॒ग्नि॒र्मा॒ तस्मा॒दे॒न॒सो॒ गार्ह॑प॒त्यः॒ प्रमु॑ञ्चतु च॒कृ॒म या॒नि॑  
दुष्कृ॒ता स्वाहा॑॥६॥

(अ॒ग्नये॑ गा॒र्हप॒त्याय॑ इ॒दं न॑ म॒म)

ये॒न त्रि॒तो अ॑र्ण॒वा॒न्नि॒र्ब॒भू॒व ये॒न॒ सूर्य॑ त॒म॒सो निर्मु॑मोच॑। ये॒नेन्द्रो॑ वि॒श्वा॒  
अ॒ज॒हा॒दरा॑ती॒स्तेना॒हं ज्योति॑षा॒ ज्योति॑रान॒शा॒न आ॑क्षि॒ स्वाहा॑॥७॥

(अ॒ग्नये॑ ज्योति॑ष इ॒दं न॑ म॒म)

यत्कु॒सी॒दम॑प्र॒ती॒त्तं म॒ये॒ह ये॒न॒ य॒मस्य॑ नि॒धि॒ना॒ चरा॑मि। ए॒तत्तद॑ग्रे  
अ॒नृ॒णो भ॑वामि॒ जी॒वन्ने॒व प्र॒ति॒ तत्ते॑ द॒धामि॒ स्वाहा॑॥८॥

(अ॒ग्नय॑ इ॒दं न॑ म॒म)

य॒न्म॒रि॒यं मा॒ता गर्भे॑ स॒ति। ए॒न॒श्च॒कार॒ यत्पि॒ता। अ॒ग्नि॒र्मा॒ तस्मा॒दे॒न॒सः।  
गार्ह॑प॒त्यः॒ प्र मु॑ञ्चतु। दुरि॒ता या॒नि॑ च॒कृ॒म। क॒रोतु॑ मा॒म॒ने॒न॒सः॒  
स्वाहा॑॥९॥

(अ॒ग्नये॑ गा॒र्हप॒त्याय॑ इ॒दं न॑ म॒म)

यदा॑ पि॒पे॒षं मा॒तरं॑ पि॒तर॑म्। पु॒त्रः प्र॑मु॒दितो॑ ध॒यन्। अहि॑सि॒तौ  
पि॒तरौ॑ म॒या॒ तत्। तद॑ग्रे अ॒नृ॒णो भ॑वामि॒ स्वाहा॑॥१०॥

(अ॒ग्नय॑ इ॒दं न॑ म॒म)

यद॒न्तरि॑क्षं पृथि॒वीमु॒त द्यां॑ य॒न्मा॒तरं॑ पि॒तरं॑ वा जिहि॑सि॒म॥  
अ॒ग्नि॒र्मा॒ तस्मा॒दे॒न॒सः। गार्ह॑प॒त्यः॒ प्र मु॑ञ्चतु। दुरि॒ता या॒नि॑ च॒कृ॒म।

क॒रोतु॒ माम॑ने॒नस॒ः॒ स्वाहा॑॥११॥

(अग्नये गार्हपत्याय इदं न मम)

यदा॒शसा॑ नि॒शसा॑ यत्प॑रा॒शसा॑॥ यदे॑न॒श्चकृ॑मा नू॒तनं॑ यत्पु॑रा॒णम्।  
अ॒ग्नि॒र्मा तस्मा॑दे॒नसः॑। गा॒र्ह॒पत्यः॑ प्र मु॑ञ्चतु। दुरि॒ता या॒नि च॑कृ॒म।  
क॒रोतु॒ माम॑ने॒नस॒ः॒ स्वाहा॑॥१२॥

(अग्नये गार्हपत्याय इदं न मम)

अति॑ क्रामामि दुरि॒तं यदे॑नः। जहा॑मि रि॒प्रं प॑र॒मे सु॒धस्थे॑। यत्र॑  
यन्ति॑ सु॒कृ॒तो नापि॑ दु॒ष्कृ॒तः। तमा॑ रो॒हामि॑ सु॒कृ॒तां नु॒ लो॒कः॒  
स्वाहा॑॥१३॥

(अग्नय इदं न मम)

त्रि॒ते दे॒वा अ॑मृ॒जतै॒तदे॑नः। त्रि॒त ए॒तन्म॑नु॒ष्येषु॑ मामृ॒जे। ततो॑ मा॒  
यदि॑ किञ्चि॒दान॑शे। अ॒ग्नि॒र्मा तस्मा॑दे॒नसः॑। गा॒र्ह॒पत्यः॑ प्र मु॑ञ्चतु।  
दुरि॒ता या॒नि च॑कृ॒म। क॒रोतु॒ माम॑ने॒नस॒ः॒ स्वाहा॑॥१४॥

(अग्नये गार्हपत्याय इदं न मम)

दि॒वि जा॒ता अ॒प्सु जा॒ताः। या॒ जा॒ता ओष॑धी॒भ्यः। अथो॒ या  
अ॒ग्नि॒जा आपः॑। ता नः॑ शु॒न्धन्तु॑ शु॒न्धनीः॑ स्वाहा॑॥१५॥

(अद्ध्यः शुन्धनीभ्य इदं न मम)

यदा॒पो न॑क्तं दुरि॒तं च॑रा॒म। यद्वा॑ दि॒वा नू॒तनं॑ यत्पु॑रा॒णम्।  
हि॒र॒ण्यव॑र्णास्त॒त उत्पु॑नीत नः॒ स्वाहा॑॥१६॥

(अद्ध्यो हिर्ण्यवर्णाभ्य इदं न मम)

इ॒मं मे॑ वरु॒ण श्रु॒धी ह॒वम॒द्या च॑ मृ॒ळय॑। त्वाम॑व॒स्युराच॑के॒  
स्वाहा॑॥१७॥

(वरुणाय इदं न मम)

तत्त्वा॑ यामि॒ ब्रह्म॑णा॒ वन्द॑मान॒स्तदाऽऽशा॑स्ते॒ यज॑मानो ह॒विर्भिः॑।  
अहै॑ळ॒मानो॑ वरु॒णेह॑ बो॒द्ध्युरु॑श॒स मा न॒ आयुः॑ प्रमो॑षीः  
स्वाहा॑॥१८॥

(वरुणाय इदं न मम)

त्वं नो॑ अ॒ग्ने वरु॑णस्य वि॒द्वान् दे॒वस्य॑ हे॒ळोऽवं॑ यासि॒सीष्ठाः॑। यजि॑ष्ठो  
वहि॑तमः॒ शोशु॑चानो॒ विश्वा॒ द्वेषा॑सि॒ प्र मु॑मु॒ग्यस्म॒त्स्वाहा॑॥१९॥

(अग्नीवरुणाभ्याम् इदं न मम)

स त्वं नो॑ अ॒ग्नेऽव॒मो भ॑वोती नेदि॑ष्ठो अ॒स्या उ॒षसो॑ व्यु॒ष्टौ। अ॒वं यक्ष॑व  
नो॒ वरु॑ण॒स ररा॑णो वी॒हि मृ॑ळी॒कसु॑हवो॒ न एधि॑ स्वाहा॑॥२०॥

(अग्नीवरुणाभ्याम् इदं न मम)

प्र ण॒ आयू॑षि॒ तारि॑षत्। त्वम॑ग्ने अ॒यासि॑। अ॒या सन्मन॑सा हि॒तः।  
अ॒या सन् ह॒व्यमू॑हिषे। अ॒या नो॑ धेहि भेष॒जसु॑ स्वाहा॑॥२१॥

(अग्रये अयस इदं न मम)

यददी॑व्य॒न्नृण॑म॒हं ब॒भूवादि॑त्सन्वा सञ्ज॒गर॒ जनै॑भ्यः। अ॒ग्निर्मा॑

तस्मादिन्द्रश्च संविदानौ प्रमुञ्चतां॑ स्वाहा॥२२॥

(इन्द्राग्निभ्याम् इदं न मम)

यद्धस्ताभ्यां चकर किल्बिषाण्यक्षाणां वृष्टुमुपजिघ्रमानः। उग्रं पश्या च राष्ट्रभृच्च तान्यप्सरसावनुदत्तामृणानि स्वाहा॥२३॥

(उग्र-पश्य-राष्ट्रभृद्भ्याम् अप्सरोभ्याम् इदं न मम)

उग्रं पश्ये राष्ट्रभृत्किल्बिषाणि यदक्षवृत्तमनुदत्तमेतत्। नेत्रं ऋणानृणव इत्थसमानो यमस्य लोके अधिरञ्जुराय स्वाहा॥२४॥

(उग्र-पश्या राष्ट्रभृद्भ्याम् अप्सरोभ्याम् इदं न मम)

अवं ते हेडो वरुण नमोभिरवं यज्ञेभिरीमहे हविर्भिः। क्षयन्नस्मभ्यमसुर प्रचेतो राजन्नेनासि शिश्रथः कृतानि स्वाहा॥२५॥

(वरुणाय इदं न मम)

उदुत्तमं वरुण पाशमस्मदवाधुमं वि मध्यमं श्रथाय। अथा वयमादित्य व्रते तवानांगसो अदितये स्याम स्वाहा॥२६॥

(वरुणाय इदं न मम)

इमं मे वरुण श्रुधी हवमद्या च मृळय। त्वामवस्युराचके स्वाहा॥२७॥

(वरुणाय इदं न मम)

तत्त्वा॑ यामि॒ ब्रह्म॑णा॒ वन्द॑मान॒स्तदाऽऽशा॑स्ते॒ यज॑मानो ह॒विर्भिः॑।  
अहे॑ळमानो वरु॒ण॒ह बो॒द्ध्युरु॑श॒स॒ मा न॒ आयुः॑ प्रमो॑षीः  
स्वाहा॑॥२८॥

(वरुणाय इदं न मम)

त्वं नो॑ अग्ने वरु॒णस्य॑ वि॒द्वान् दे॒वस्य॑ हे॒ळोऽवं॑ यासि॒सीष्ठाः॑। यजि॑ष्ठो  
वहि॑तमः॒ शोशु॑चानो॒ विश्वा॒ द्वेषा॑सि॒ प्र मु॑मुग्ध्य॒स्मत्स्वाहा॑॥२९॥

(अग्नीवरुणाभ्याम् इदं न मम)

स त्वं नो॑ अग्नेऽव॒मो भ॑वोती नेदि॑ष्ठो अ॒स्या उ॒षसो॑ व्यु॒ष्टौ। अव॑ यक्ष्व  
नो॒ वरु॑ण॒स॒ ररा॑णो वी॒हि मृ॑ळी॒क॒सु॒हवो॑ न ए॒धि स्वाहा॑॥३०॥

(अग्नीवरुणाभ्याम् इदं न मम)

सङ्कु॑सुको॒ वि॒कु॑सुको॒ निर्ऋ॑थो यश्च॑ नि॒स्व॒नः। तेऽ(१)स्मद्य॑क्ष्म॒मना॑-  
गसो॑ दू॒रादू॒रम॑चीचत॒ऽस्व॒ स्वाहा॑॥३१॥

(सङ्कुसुक वि॒कु॑सुक॒ निर्ऋ॑थ नि॒स्व॒नेभ्य॑ इदं न मम)

निर्य॑क्ष्ममचीचते कृ॒त्यां निर्ऋ॑तिं च। तेन॒ योऽ(१)स्मत्स॑मृ॒च्छाते॑  
तम॑स्मै प्रसु॑वामसि॒ स्वाहा॑॥३२॥

(निर्ऋत्या इदं न मम) [अप उपस्पृश्य]

दुःश॑स॒सानु॑श॒साभ्या॑ घ॒णेना॑नुघ॒णेन॑ च। तेना॒न्योऽ(१)स्मत्स॑मृ॒च्छाते॑  
तम॑स्मै प्रसु॑वामसि॒ स्वाहा॑॥३३॥

(दुःश॑स॒सानु॑श॒स॒घ॒णेना॑नुघ॒णेभ्य॑ इदं न मम)

सं वर्च॑सा पय॑सा सन्त॒नूभि॑रग॒न्महि॑ मन॑सा स॒ शिवे॑न। त्वष्टा॑ नो  
अत्र॒ विद॑धातु रा॒योऽनु॑मार्ष्टु॒ तन्वो॑(१) यद्वि॒लि॒ष्ट॒ऽ॒ स्वाहा॑॥३४॥

(त्वष्ट्र इदं न मम)

आयु॑ष्टे वि॒श्वतो॑ दध॒दय॑म॒ग्निर्वरे॑ण्यः। पुन॑स्ते प्रा॒ण आया॑ति  
परा॒यक्ष्म॑ सु॒वामि॑ ते स्वाहा॑॥३५॥

(वरेण्यायाग्रय इदं न मम)

आ॒यु॒र्दा अ॑ग्रे ह॒विषो॑ जुषा॒णो घृ॒तप्र॑तीको घृ॒तयो॑निरेधि। घृ॒तं पी॒त्वा  
मधु॑ चारु॒ गव्यं॑ पि॒तेव॑ पु॒त्रम॑भि॒रक्ष॑तादि॒म॒ऽ॒ स्वाहा॑॥३६॥

(आयुर्दे अग्रय इदं न मम)

इ॒मम॑ग्र॒ आयु॑षे वर्च॑से कृ॒धि ति॒ग्ममो॑जो वरु॒ण स॒ शि॑शाधि।  
मा॒तेवा॑स्मा अदि॒ते शर्म॑ यच्छु॒ विश्वे॑ दे॒वा ज॑रद॒ष्टिर्य॑था-  
ऽस॒त्स्वाहा॑॥३७॥

(अग्निवरुणादिति-विश्वेभ्यो देवेभ्य इदं न मम)

अग्र॒ आयू॑षि पव॒स आ सु॒वोर्ज॑मिषं च नः। आ॒रे बा॑धस्व  
दुच्छु॒ना॒ऽ॒ स्वाहा॑॥३८॥

(अग्रये पवमानाय इदं न मम)

अग्रे॒ पव॑स्व॒ स्वपा॑ अ॒स्मे वर्चः॑ सु॒वीर्य॑म्। दध॑द्र॒यिं मयि॑ पोष॒ऽ॒

स्वाहा॥३९॥

(अग्नये पवमानाय इदं न मम)

अ॒ग्नि॒र्ऋ॒षिः प॑व॒मानः॒ पा॒ञ्च॑ज॒न्यः पु॒रोहि॑तः। तमी॑महे महा॒ग॒य॒ः  
स्वाहा॥४०॥

(पाञ्चजन्याय अग्नय इदं न मम)

अ॒ग्ने जा॒तान्प्र॑णु॒दा नः स॒पत्नान्प्र॑त्यजा॒ताजा॑तवेदो नुदस्व। अ॒स्मे  
दी॒दिहि॑ सु॒मना॒ अहे॑ळ॒च्छर्म॑न्ते स्याम त्रि॒वरू॑थ उ॒द्धौ स्वाहा॥४१॥

(अग्नये जातवेदस इदं न मम)

सह॑सा जा॒तान्प्र॑णु॒दा नः स॒पत्नान्प्र॑त्यजा॒ताजा॑तवेदो नुदस्व।  
अधि॑ नो ब्रू॒हि सु॒मन॒स्यमा॑नो व॒य॒ः स्या॑म प्र॒णु॒दा नः  
स॒पत्नान्स्वाहा॥४२॥

(अग्नये जातवेदस इदं न मम)

अ॒ग्ने यो नो॒ऽभि॒तो॒ जनो॒ वृ॒को वा॒रो जि॒घा॑सति। ता॒ऽस्त्वं वृ॑त्रहं  
जहि॑ वस्व॒स्मभ्य॑मा॒भर॑ स्वाहा॥४३॥

(अग्नय इदं न मम)

अ॒ग्ने यो नो॒ऽभि॒दा॒संति॑ स॒मा॒नो यश्च॑ नि॒ष्ट्यः॑। तं व॒य॒ः स॒मिधं॑  
कृ॒त्वा तु॒भ्यम॒ग्नेऽपि॑ दध्मसि॒ स्वाहा॥४४॥

(अग्नय इदं न मम)



यो नः शपादशपतो यश्च नः शपंतः शपात्। उषाश्च तस्मै निमृक्क  
सर्वं पापं समूहतां स्वाहा॥४५॥

(उषो निमृग्भ्याम् इदं न मम)

यो नः सपत्नो यो रणो मर्तोऽभिदासंति देवाः। इध्मस्यैव प्रक्षायतो  
मा तस्योच्छेषि किं च न स्वाहा॥४६॥

(अग्नय इदं न मम)

यो मां द्वेष्टि जातवेदो यं चाहं द्वेष्मि यश्च माम्। सर्वांस्तानग्रे  
सन्दह याश्चाहं द्वेष्मि ये च मां स्वाहा॥४७॥

(अग्नय इदं न मम)

यो अस्मभ्यमरातीयाद्यश्च नो द्वेषते जनः। निन्दाद्यो  
अस्मान्दिप्साच्च सर्वांस्तान्मष्मषा कुरु स्वाहा॥४८॥

(अग्नय इदं न मम)

संशितं मे ब्रह्म संशितं वीर्या(१)म्बलम्। संशितं क्षत्रं मे  
जिष्णु यस्याहमस्मि पुरोहितः स्वाहा॥४९॥

(ब्रह्मण इदं न मम)

उदेषां बाहू अतिरमुद्वर्चो अथो बलम्। क्षिणोमि ब्रह्मणाऽमित्रानुन्न-  
यामि स्वा(१)म् अहं स्वाहा॥५०॥

(अग्नय इदं न मम)

पुन॑र्मनः पुन॑रायु॑र्म आगा॑त्पुन॑श्चक्षुः पुनः श्रोत्रं॑ म॒ आगा॑त्पुनः प्रा॒णः  
पुन॑राकू॑तं म॒ आगा॑त्पुन॑श्चित्तं पुन॑राधी॑तं म॒ आगा॑त्। वैश्वान॑रो  
मेऽद॑ब्धस्तनू॒पा अव॑बाधतां दुरि॒तानि॑ विश्वा॒ स्वाहा॑॥५१॥

(अग्नये वैश्वानराय इदं न मम)

## ॥ बोधायन-मतानुसारेण अष्टौ होममन्त्राः ॥

सि॒॒हे व्या॒घ्र उ॒त या पृ॒दा॑कौ। त्विषि॑र॒ग्नौ ब्रा॑ह्म॒णे सूर्ये॒ या। इन्द्रं॑  
या दे॒वी सु॒भगा॑ ज॒जान॑। सा न॒ आग॑न्वर्चसा संविदा॒ना स्वाहा॑॥१॥

(त्विष्यै देव्या इदं न मम)

या रा॑ज॒न्ये दु॒न्दुभा॑वाय॒तायाम्। अश्व॑स्य॒ क्रन्द्ये॒ पुरु॑षस्य मा॒यौ।  
इन्द्रं॑ या दे॒वी सु॒भगा॑ ज॒जान॑। सा न॒ आग॑न्वर्चसा संविदा॒ना  
स्वाहा॑॥२॥

(त्विष्यै देव्या इदं न मम)

या ह॒स्तिनि॑ द्वी॒पिनि॒ या हि॑र॒ण्ये। त्विषि॑र॒श्वेषु॑ पुरु॒षेषु॑ गो॒षु॥१६॥  
इन्द्रं॑ या दे॒वी सु॒भगा॑ ज॒जान॑। सा न॒ आग॑न्वर्चसा संविदा॒ना  
स्वाहा॑॥३॥

(त्विष्यै देव्या इदं न मम)

रथे॑ अ॒क्षेपु॑ वृष॒भस्य॒ वाजे॑। वाते॑ प॒र्जन्ये॒ वरु॑णस्य॒ शुष्मे॑। इन्द्रं॑ या

दे॒वी सु॒भगा॑ ज॒जान॑। सा न॒ आग॒न्वर्च॑सा संविदा॒ना स्वाहा॑॥४॥  
(त्विष्ये देव्या इदं न मम)

अग्ने॑ऽभ्यावर्ति॒न्नभि॑ न॒ आ वर्त॑स्वायु॒षा वर्च॑सा स॒न्या मे॒धया॑ प्र॒जया॒  
धने॑न॒ स्वाहा॑॥५॥

(अग्नये अभ्यावर्तिन इदं न मम)

अग्ने॑ अङ्गिरः श॒तं ते॑ स॒न्त्वावृ॑तः स॒हस्रं॑ त उपा॒वृ॒तः। तासां॑ पोष॑स्य  
पोषे॑ण पुन॑र्नो न॒ष्टमा॑ कृ॒धि पुन॑र्नो र॒यिमा॑ कृ॒धि स्वाहा॑॥६॥

(अग्नये अभ्यावर्तिन इदं न मम)

पुन॑रू॒र्जा नि॑ वर्त॑स्व पुन॑र॒ग्न इ॒षायु॑षा। पुन॑र्नः पाहि॑ वि॒श्वतः॑  
स्वाहा॑॥७॥

(अग्नये अभ्यावर्तिन इदं न मम)

स॒ह र॒य्या नि॑ वर्त॑स्वाग्ने पि॒न्वस्व॑ धा॒रया॑। वि॒श्वप्ति॑न्वा वि॒श्वत॑स्प॒रि  
स्वाहा॑॥८॥

(अग्नये अभ्यावर्तिन इदं न मम)

## ॥ उपस्थान-मन्त्राः ॥

वैश्वानराय प्रतिवेदयामो यदीनृणः सङ्गरो देवतासु। स  
 एतान्पाशान् प्रमुचन् प्रवेद स नो मुञ्चातु दुरितादवद्यात्। वैश्वानरः  
 पवयान्नः पवित्रैर्यथ्सङ्गरमभिधावाभ्याशाम्। अनाजानन्मनसा  
 याचमानो यदत्रैनो अव तथ्सुवामि। अमी ये सुभगे दिवि विचृतौ  
 नाम तारके। प्रेहामृतस्य यच्छतामेतद्वद्धकमोचनम्। विजिहीर्ष्व  
 लोकान्कृधि बन्धान्मुञ्चासि बद्धकम्। योनैरिव प्रच्युतो गर्भः सर्वान्  
 पथो अनुष्व। स प्रजानन्प्रतिगृणीत विद्वान्प्रजापतिः प्रथमजा  
 ऋतस्य। अस्माभिर्दत्तं जरसः परस्तादच्छिन्नं तन्तुमनुसञ्चरेम॥१॥

तत् तन्तुमन्वेके अनु सञ्चरन्ति येषां दत्तं पित्र्यमायनवत्।  
 अबन्ध्वेके ददतः प्रयच्छाद्दातुं चेच्छक्रवांसः स्वर्ग एषाम्।  
 आरभेथामनु सञ्चरभेथाः समानं पन्थामवथो घृतेन। यद्वा  
 पूर्तं परिविष्टं यदग्नौ तस्मै गोत्रायेह जायापती सञ्चरभेथाम्।  
 यदन्तरिक्षं पृथिवीमुत द्यां यन्मातरं पितरं वा जिहिःसिम।  
 अग्निर्मा तस्मादेनसो गार्हपत्य उन्नो नेषद्दुरिता यानि चकृम।  
 भूमिर्माताऽदितिर्नो जनित्रं भ्राताऽन्तरिक्षमभिशास्त एनः। द्यौर्नः  
 पिता पितृयाच्छं भवासि जामि मित्वा मा विविथ्सि लोकात्।  
 यत्र सुहार्दः सुकृतो मदन्ते विहाय रोगं तन्वा(१)ः स्वायाम्।  
 अश्लोणाङ्गैरहुताः स्वर्गे तत्र पश्येम पितरं च पुत्रम्। यदन्नमद्व्यनृतेन  
 देवा दास्यन्नदास्यन्नुत वा करिष्यन्। यद्देवानां चक्षुष्यागो अस्ति

यदे॒व किं॑ च॑ प्र॒तिज॑ग्रा॒हम॒ग्निर्मा॑ तस्मा॑दनृ॒णं कृ॑णोतु। यदन्न॒मग्निं॑  
 बहु॒धा वि॑रूपं॒ वासो॑ हि॒रण्य॑मु॒त गाम॒जाम॒विम्। यद्दे॒वानां॑ चक्षु॒ष्यागो॑  
 अस्ति॒ यदे॒व किं॑ च॑ प्र॒तिज॑ग्रा॒हम॒ग्निर्मा॑ तस्मा॑दनृ॒णं कृ॑णोतु।  
 यन्मया॑ मन॑सा वा॒चा कृ॒तमे॑नः कदा॒चन। सर्व॑स्मा॑त्तस्मा॑न्मेळि॒तो  
 मो॒ग्धि॒ त्व॑ हि वे॒त्थ यथा॑तथम्॥



generated on **March 16, 2024**

Downloaded from



<http://stotrasamhita.github.io> |  StotraSamhita | Credits